

COMUNICATO n. 132 del 22/01/2026

'Z izta khent geredet, vor earst, von Plån vor di informatziong un bia innzotoala in provintziàl Font vor di zungmindarhaitn vorz djar 2026

Konferéntz von Zungmindarhaitn, Marchiori: “An trèff boda schauget zuar dar zuarkhemmane vo alla ünsar kamòuschafft”

[Cimbroy] 'Z iztase gehaltet in tages von 21 von hoachnach, in di Depero Saal von palatz, setz vodar autonome Provìntz vo Tria, da XLI Konferéntz von zungmindarhaitn, dar òrgan boda lekk panàndar di politike von fòlk boda gehöarn in zungmindarhaitn ladinar, möknar un zimbar. Vor earst izta khent geredet übar in Plån vor di informatziong un bia innzotoala in provintziàl Font vor di zungmindarhaitn vorz djar 2026, un dena darzuar übar di naüng kritèrie bia ma mocht schètzan di prüf boda zuargem ke ma khennt di zung un di kultùr von mindarhaitn un, darnå, vo ettlane åndre initziatìvan. Vor earst hatta genump 'z bort dar provintziàl asesór vor di politike vorz gehäus, schatz un zo macha khennt di autonomì, Simone Marchiori, boda, åhevante soi rede, hatt khött ke 'z iz gântz bichte vennese garade pittnàndar vor di Konferéntz. “An momént zo khennase, zo vorstianase pezzar un zo kreschra pittnàndar, nèt lai zbisnen zungmindarhaitn ma pinn gântz Trentino, zo schauga vür. An grüntliche momént vor ünsar autonomì”, asó hatta khött dar asesór.

'Z hãmda genump toal ettlane laüt, zbisnen disan dar redjonàl asesór vor di zungmindarhaitn Luca Guglielmi, di istituzionàl vortretar von Kamöündar boda gehöarn in zungmindarhaitn, di vortretar von Kulturinstitut ladinar, möknar un zimbar, di diridjéntn von schualn von lentar von zungmindarhaitn, dar vorsitar vodar Union di ladins de Fascia dar vorsitar vodar Union generela di ladins dla Dolomites. 'Z hatta o genump toal in trèff di diridjéntn von Dienst vor di zungmindarhaitn un auzantn sachandarn Elisabetta Sovilla.

Vor bazta ågeat in Plån vor di informatziong un di djornél dar progråmm lekk vür auzohalta initziatìvan boda machan khennt di zungen von zungmindarhaitn auz von lentar bosa gehöarn o, initziatìvan vürgevüart von kulturinstitut un von Comun general de Fascia. Zbisnen disan: di saitn, boda auzgian alln sovl zait, afte tagesche djornél vodar provìntz, di teledjornél vo alle bochan, un trasmisiongen afte radio un aftn web, di kürs zo lina di zung un åndre sachandarn boda ågian libadarn, komunikatziong un asó vort, ploaz sachandarn boda zuargem zo informara pezzar, boda helvan innzovånga hërta mearare laüt un pezzan di qualitét vodar informatziong sèlbart. Dar gântz provintziàl Font zo schütza di zungmindarhaitn iz vo schiar 700 tausankh euro un haltet inn darzuar in sèll boda sa iz khent geschribet da obar, auzohalta di informatziong in di zungen von zungmindarhaitn, di sèlln vürgevüart garade vodar Provìntz, initziatìvan un prodjèkte boda soin starch bichte zo schütza di zungmindarhaitn un boda khemmen vürgelekk von kamöündar, von schualn un von kulturinstitut un no: vor kulturàl prodjèkte un vor zung politik von Comun General de Fascia.

'Z khinta untargelekk darzuar åndarz gèlt o, baispil vor di trasmisiongen ORF1 un ORF Sport boda hãm 'z zil zo sichra alln zo maga seng di kanél aftz taütsch, asó in gântzan dar Font khint z'soina vo 900 tausankh euro.

In trèff izta o khent geredet vo baz ma böllat bèksln von regln zo haba in patentì boda sichart ke ma khent di zungen un di kultùrn von zungmindarhaitn, nâ in sèll boda auzmacht dar Européan Regolamént (QCER) un darnâ vornaügarn di prüf boda bartn khemmen gemacht vor ditza.

Foto un film von Prèss Amt

Download pilda un intervista [da](#)

(cdt)